



LE GOUVERNEMENT
DU GRAND-DUCHÉ DE LUXEMBOURG
Ministère de l'Éducation nationale,
de l'Enfance et de la Jeunesse

Gemeinsam Äntwert vum Minister fir Educatioun, Kanner a Jugend, Claude Meisch, a vum Minister fir Famill, Solidaritéit, Zesummeliewen an Accueil, Max Hahn, op d'parlamentaresch Fro Nr. 2278 vum honorabelen Deputéierte Sven Clement

1. Wéi huet sech d'Zuel vun internationalen Adopitiounen zu Lëtzebuerg an de leschte fënnef Joer entwéckelt?

An de leschte fënnef Joer huet sech d'Zuel vun internationalen Adopitiounen zu Lëtzebuerg follgendermoossen entwéckelt:

<i>Joer</i>	<i>Unzuel vun aus dem Ausland adoptéierte Kanner</i>
2018	18
2019	11
2020	8
2021	9
2022	10
2023	19
2024	11

2. Kann d'Regierung d'Observatioun bestätegen, datt de Profil vun de Kanner, déi fir international Adopitiounen a Fro kommen, sech verännert huet? Falls jo, ëm wéi eng spezifesch Ännerungen handelt et sech?

Et ass allgemeng esou, datt weltwäit d'Zuel vun den Adoptivkanner, déi e spezifesch Besoin hunn an déi an d'Ausland placéiert ginn, an d'Luucht geet. Ee vun de Grënn ass de Subsidiaritätsprinzip. Et ass allerdéngs net méiglech, e Profile type opzestellen, all Kand ass aneschtens.

D'Eltere ginn dorobber virbereet, datt och Eltere fir Kanner mat spezifesch Besoine gesicht ginn; si hunn allerdéngs d'Méiglechkeet ze soen, wat hir Limitten sinn, wat de Gesondheits- an Entwécklungszoustand vum Kand ugeet. All Eltere mussen oppe si fir e Kand, wat an der sougenannter „normalité adoptive“ ass. Dat heescht, datt si sech mussen drop astellen, datt d'Kanner bis zu dräi Joer al kënnen sinn an datt si och eventuell e klengen Entwécklungsréckstand, oder kleng medezinesch Problemer par rapport zu engem Kand vum selwechten Alter, wat a senger Famill opwuesse konnt, kënnen hunn.

Déi Kanner, déi während der Pandemie op Lëtzebuerg koumen, waren zum Deel méi al. Och e Kand, wat méi al ass, gëtt als Kand mat spezifesch Besoine vermëttelt, doduerjer datt d'Prozedur einfach méi laang gedauert huet. An Tëschenzäit ass d'ësst net méi de Fall an d'Kanner sinn erëm méi jonk, wann si zu Lëtzebuerg ukommen.

3. Wéi eng Moosname plangt d'Regierung, fir Lëtzebuerger Familljen ze ënnerstëtzen, déi Kanner mat spezielle Bedürfnisser adoptéiere wëllen?

Déi zukünfteg Eltere ginn aktuell schonns duerch e Virbereedungszyklus, an deem vun Ufank un iwwer de Profil vun de Kanner geschwat gëtt. No generellen Informatiounsseancë ginn déi Leit, déi un enger

Adoptioun interesséiert sinn a Sensibiliséierungsversammlungen (véier Seancë vu jee véier Stonnen), déi vun der *Maison de l'Adoption* vun dem *Lëtzebuurger Roude Kräiz* organiséiert ginn, agelueden.

An dëse Seancë ginn déi zukünfteg Eltere spezifesch op déi speziell Bedürfnisser virbereet, déi en Adoptivkand matbréngen kann. An enger vun dëse Seancë kréien déi zukünfteg Elteren Informatiounen iwwer d'Adoptioun vun engem Kand mat spezifesche Besoinen. Falls d'Kandidaten op dëse Wee goe wëllen, kënnen si un zousätzlechen, méi geziilte Sensibiliséierungsséancen deelhuefen, fir sech op dëse Projet virzubereeden.

Si kréien och Informatiounen, wéi een d'Erausforderungen, déi eng Adoptioun mat sech bréngt, kann ugoen. Ënnerstëtzung kréien d'Familljen natierlech och vun deem Adoptiounsorganismus, deen hir Adoptiounsprozedur encadréiert.

No der Adoptioun huet all Famill d'Méiglechkeet, u verschiddenen Ateliere vun der *Maison de l'Adoption* deelzehuelen oder eng individualiséiert Ënnerstëtzung ze froen, fir datt d'Integratioun vum Kand a seng nei Famill an de beschte Konditiounen geschitt.

No der Adoptioun kritt d'Famill och Ënnerstëtzung vum Adoptiounsorganismus.

Persounen, déi e Kand mat spezifesche Besoinen adoptéieren, hunn Urecht op déi selwecht Ënnerstëtzung an Accès zu de selwechte Servicer, wéi all aner Elteren, déi e Kand mat spezifesche Besoinen hunn. Fir Adoptivkanner mat spezifesche Besoinen kënnen d'Adoptivfamillje sech deemno och un all aneren nationale Service wenden, dee spezialiséiert ass an der *Prise en charge* vu Kanner mat spezifesche Besoinen.

4. Wéi steet d'Regierung zu der Entwécklung vum Prinzip vun der Subsidiaritéit an den Hierkonftslänner a wéi eng Konsequenzen huet dat fir eisen nationale gesetzlechen a reglementaire Kader?

De Subsidiaritéitsprinzip ass agefouert ginn duerch d'Haager Konventioun vun 1993 iwwer d'international Adoptioun. Lëtzebuerg huet dës Konventioun duerch e Gesetz vum 14. Abrëll 2002 ëmgesat.

De Prinzip, datt d'international Adoptioun als lescht Méiglechkeet zeréckbehale gëtt fir e Kand, fir dat weder e Familljemember konnt fonnt ginn nach eng Famill a sengem Hierkonftsland, déi et kéint adoptéieren, ass am Sënn vun de Kanner an ass deemno net a Fro ze stellen. De Subsidiaritéitsprinzip huet en Impakt op d'Zuel vun de Kanner, déi eng international Adoptioun brauchen. Dëse Prinzip huet allerdéngs keen Afloss op eisen nationale gesetzlechen a reglementaire Kader.

5. Gëtt et Bestriewungen op EU-Niveau oder international, fir d'Adoptiounsprozeduren un dës nei Realitéit unzepassen?

De Subsidiaritéitsprinzip gëtt vun den Hierkonftslänner zanter Joren ugewannt. Dëse Prinzip soll et de Kanner erlaben, weider an hirem Hierkonftsland liewen ze kënnen. Et ass net virgesinn, de Subsidiaritéitsprinzip ofzeschaffen.

Lëtzebuerg, den 10. Juni 2025

De Minister fir Educatioun,
Kanner a Jugend

(s.) Claude MEISCH